



**O‘ZBEKISTON RESPUBLIKASI VAZIRLAR MAHKAMASI HUZURIDAGI
TA’LIM SIFATINI NAZORAT QILISH DAVLAT INSPEKSIYASI
O‘ZBEKISTON RESPUBLIKASI MADANIYAT VAZIRLIGINING
QARORI**

**O‘zbekiston Respublikasi Madaniyat vazirligi tizimidagi ta’lim muassasalari
pedagog kadrlarining o‘quv fanidan malaka sinovlarini tashkil etish
to‘g‘risida**

O‘zbekiston Respublikasi Vazirlar Mahkamasining “Maktabgacha, umumiy o‘rta, o‘rta maxsus, professional va maktabdan tashqari ta’lim tashkilotlari pedagog kadrlarini attestatsiyadan o‘tkazish tartibini takomillashtirish chora-tadbirlari to‘g‘risida” 2021-yil 17-sentabrdagi 572-son qaroriga muvofiq O‘zbekiston Respublikasi Vazirlar Mahkamasini huzuridagi Ta’lim sifatini nazorat qilish davlat inspeksiyasi va Madaniyat vazirligi **qaror qiladi:**

1. Ixtisoslashtirilgan san’at va madaniyat maktablari, maktab-internatlari, Respublika musiqa va san’at kolleji, Karim Zaripov nomidagi respublika estrada va sirk kolleji hamda bolalar musiqa va san’at maktablari (keyingi o‘rinlarda – ta’lim muassasalari) pedagog kadrlarining o‘quv fanidan malaka sinovlari ijodiy sinov shakilda 2022-yil 10-30-may kunlari o‘tkazilsin.

Belgilansinki, “Musiqa nazariyasi”, “Garmoniya”, “Solfedjio”, “O‘zbek musiqasi tarixi”, “Musiqa adabiyoti”, “Jahon musiqasi tarixi”, “San’at tarixi” fanlaridan malaka sinovlari test sinovlari shaklida o‘tkaziladi.

2. Quyidagilar:

Ixtisoslashtirilgan san’at va madaniyat maktablari, maktab-internatlari, Respublika musiqa va san’at kolleji, Karim Zaripov nomidagi respublika estrada va sirk kolleji hamda bolalar musiqa va san’at maktablari pedagog kadrlarining o‘quv fanidan malaka sinovlarini tashkil etish va o‘tkazish bo‘yicha ishchi guruh (keyingi o‘rinlarda – ishchi guruh) tarkibi 1-ilovaga muvofiq;

Ixtisoslashtirilgan san’at va madaniyat maktablari, maktab-internatlari, Respublika musiqa va san’at kolleji, Karim Zaripov nomidagi respublika estrada va sirk kolleji hamda bolalar musiqa va san’at maktablari pedagog kadrlarining o‘quv fanidan malaka sinovida foydalaniladigan ijodiy topshiriqlar ro‘yxati 2-ilovaga muvofiq;

Ixtisoslashtirilgan san’at va madaniyat maktablari, maktab-internatlari, Respublika musiqa va san’at kolleji, Karim Zaripov nomidagi respublika estrada

va sirk kolleji hamda bolalar musiqa va san'at maktablari pedagog kadrlarining o'quv fanidan malaka sinovida foydalaniladigan ijodiy topshiriqlarni bajarish uchun ijro etiladigan asarlar ro'yxati 3-ilovaga muvofiq tasdiqlansin.

3. Ishchi guruh:

ta'lim muassasalari pedagog kadrlarining ta'lim to'g'risidagi hujjatida ko'rsatilgan tayyorlov, ta'lim yo'nalishi va mutaxassisligi yoki ixtisosligi bo'yicha bilimlarini shaffof va adolatli sinovdan o'tkazilishini ta'minlash;

sinovlarni tashkil etishda Vazirlar Mahkamasining 2021-yil 17-sentabrdagi 572-son qarori bilan tasdiqlangan Maktabgacha, umumiy o'rta, o'rta maxsus, professional va maktabdan tashqari ta'lim tashkilotlari pedagog kadrlarini attestatsiyadan o'tkazish tartibi to'g'risidagi nizomga 7-ilovada belgilangan ijodiy sinovlarni baholash mezonlariga qat'iy amal qilish;

sinovlar yakunlariga doir ma'lumotlarni Vazirlar Mahkamasi huzuridagi Ta'lim sifatini nazorat qilish davlat inspeksiyasiga (keyingi o'rinlarda – Ta'lim inspeksiyasi) va Madaniyat vazirligiga taqdim etish choralari ko'rsin.

4. Ta'lim inspeksiyasining Ta'lim sifatini monitoring qilish bosh boshqarmasi (A.Maxmudov):

o'tkaziladigan malaka sinovlari jarayonlari ovozli videotasvirga olinishini nazorat qilsin hamda videotasvir kamida bir yil saqlanishini ta'minlasin;

malaka sinovi natijalari sinovlar yakunlanishi bilan darhol e'lon qilinishini tashkil etsin.

5. Ta'lim inspeksiyasining Pedagog kadrlar sifati nazorati, ta'lim hujjatlarini legallashtirish, tan olish va nostrifikatsiya qilish bosh boshqarmasi (D.Temirov) ga:

malaka sinovlari yakunlari bo'yicha ma'lumotlarni umumlashtirish va tahlil qilish;

malaka sinovlari yakunlariga ko'ra amaldagi malaka toifasi saqlangan, oshirilgan yoki tushirilgan pedagog kadrlarning ro'yxatini shakllantirish;

malaka sinovlaridan muvaffaqiyatli o'tganlarga elektron shakldagi sertifikatlarni rasmiylashtirib berish vazifalari yuklansin.

6. Madaniyat vazirligi Ta'lim muassasalari va sohani metodologik ta'minlash boshqarmasi (K.Mizamov):

O'zbekiston davlat konservatoriyasi (K.Urinbayev), O'zbekiston davlat san'at va madaniyat instituti (I.Yuldashev), O'zbekiston davlat xoreografiya akademiyasi (Sh.Toxtasimov) bilan birgalikda ishchi guruh a'zolarini belgilangan muddatlarda malaka sinovlari o'tkaziladigan hududlarga yetib borishini hamda ularning xizmat safari bilan bog'liq xarajatlarning (yo'l xarajati, ovqatlanish va mehmonxona xarajatlari) qoplanishini;

o'quv fanidan malaka sinovlarini topshirish uchun zarur shart-sharoitlar yaratilishini ta'minlasin.

7. Ta'lim muassasalari rahbarlari attestatsiyaga jalb etilgan pedagog kadrlarning o'quv fanidan malaka sinovlarida o'z vaqtida ishtirok etishlarini ta'minlasin.

8. Madaniyat vazirligi va Vazirlar Mahkamasi huzuridagi Ta'lim sifatini nazorat qilish davlat inspeksiyasining 2021-yil 31-martdagi 16 va 17-son "Bolalar musiqa va san'at maktablari, ixtisoslashtirilgan san'at va madaniyat maktablari hamda maktab-internatlarining pedagog kadrlarini attestatsiyadan o'tkazish bo'yicha attestatsiya komissiyalari tarkibini tasdiqlash to'g'risida"gi qarori o'z kuchini yo'qotgan deb hisoblansin.

9. Ushbu qaror imzolangan kundan e'tiboran kuchga kiradi.

10. Ushbu qarorning bajarilishini nazorat qilish Ta'lim inspeksiyasi boshlig'ining birinchi o'rinbosari X.Ketmonov hamda O'zbekiston Respublikasi madaniyat vazirining birinchi o'rinbosari B.Axmedov zimmasiga yuklansin.

**Vazirlar Mahkamasi huzuridagi
Ta'lim sifatini nazorat qilish davlat
inspeksiyasi boshlig'i**

U.Tashkenbayev

Toshkent sh.,
2022-yil 28 - 02,
05/44 -son



Madaniyat vaziri

O.Nazarbekov

Toshkent sh.,
2022-yil 28 - 02,
01-08-04 -son

